


乾隆大藏經





乾隆大藏經



第五六册 小乘論(五)

阿毗達磨順正理論

八〇卷(卷三一至卷八〇)

阿毗達磨藏顯宗論 四〇卷

尊者衆賢造	唐三藏法師玄奘奉詔譯	一
尊者衆賢造	唐三藏法師玄奘奉詔譯	七七

阿毗達磨順正理論

唐三藏法師玄奘奉
詔譯

阿毗達磨順正理論卷第三十一

尊者 衆賢 造

唐三藏法師玄奘奉詔譯

辯緣起品第三之十一

如是已辯有情世間器世間今當辯頌曰

安立器世間 風輪最居下 其量廣無數

厚十六洛叉 次上水輪深 十一億二萬

下八洛叉水 餘凝結成金 此水金輪廣

徑十二洛叉 三千四百半 周圍此三倍

論曰此百俱胝四大洲界如是安立同壤同

成謂諸有情法爾修得諸靜慮故下令終已

生第二等靜慮地中下器世間三災所壞經

久遠已依下空中由諸有情業增上力有微

風起後後轉增蟠結成輪其體堅密假設有

一大諾健那以金剛輪奮威懸擊金剛有碎



清刻龍藏佛說法變相圖

風輪無損如是風輪廣無數厚十六億踰繕那又諸有情業增上力起大雲雨澍風輪上滴如車軸積水成輪如是水輪於未凝結位深十一億二萬踰繕那廣稱風輪有言狹小有情業力持令不散如所食飲未熟變時終不移流墮於熟藏有餘師說由風所持令不傍流如箭持穀有情業力引別風起搏擊此水上結成金如熟乳停上凝成膜故水輪減唯厚八洛又餘轉成金厚三億二萬二輪界別有百俱胝一一二輪廣量皆等謂徑十二億三千四百半周圍其邊數成三倍謂周圍量成三十六億一萬三百五十踰繕那已辯三輪山今當辯頌曰

蘇迷盧處中 次踰健達羅 伊沙馱羅山
竭地洛迦山 蘇達梨舍那 頻濕縛羯拏

毗那恒迦山 尼民達羅山 於大洲等外有鐵輪圍山 前七金所成 蘇迷盧四寶入水皆八萬 妙高出亦然 餘八半半下廣皆等高量

論曰於金輪上有九大山妙高山王處中而住餘八周匝繞妙高山於八山中前七名內第七山外有大洲等此外復有鐵輪圍山周匝如輪圍四洲界持雙等七唯金所成妙高山王四寶爲體謂四面如次北東南西金銀吠瑠璃頗胝迦寶隨寶威德色顯於空故瞻部洲空似吠瑠璃色如是寶等從何而生從諸有情業增上力復大雲起雨金輪上滴如車軸經於久時積水奔濤深踰八萬猛風鑽擊寶等變生如是變生金寶等已復由業力引起別風簡別寶等攝令聚集成山成洲分

水甘鹹令別成立內海外海云何一類水別類寶等生雨水能爲異類寶等種所依藏復爲種種威德猛風之所鑽擊生衆寶等故無有過如是九山住金輪上沒水量皆等八萬踰繕那蘇迷盧山出水亦爾如是則說妙高山王從下金輪上至其頂總有十六萬踰繕那其餘八山出水高量從內至外半半漸卑謂初持雙出水四萬乃至最後鐵輪圍山出水三百一十二半如是九山一一廣量各各與自出水量同已辯九山海今當辯頌曰

山間有八海 前七名爲內 最初廣八萬
四邊各三倍 餘六半半狹 第八名爲外
三洛叉二萬 二千踰繕那

論曰妙高爲初輪圍爲後中間八海前七名內七中皆具八功德水一甘二冷三軟四輕

五清淨六不臭七飲時不損喉八飲已不傷腹如是七海初廣八萬約持雙山內邊周量於其四面數各三倍謂各成二億四萬踰繕那其餘六海量半半狹謂第二海量廣四萬乃至第七量廣一千二百五十此等不說周圍量者以煩多故准前知故第八名外鹹水盈滿量廣三億二萬二千理實應言其量復有一千二百八十七半已辯八海當辯諸洲形量有異頌曰

於中大洲相 南瞻部如車 三邊各二千
南邊有三半 東毗提訶洲 其相如半月
三邊如瞻部 東邊三百半 西瞿陀尼洲
其相圓無缺 徑二千五百 周圍此三倍
北俱盧婁方 面各一千等 中洲復有八
四洲邊各二

論曰於外海中大洲有四謂於四面對妙高山南瞻部洲北廣南狹三邊量等其相如車南邊唯廣三踰繕那半三邊各有二千踰繕那唯此洲中有金剛座上窮地際下據金輪諸最後身菩提薩埵將登無上正等菩提皆坐此座上起金剛喻定以無餘依及餘處所有堅固力能持此故東勝身洲東狹西廣三邊量等形如半月東三百五十三邊各二千此東洲東邊廣南洲南際故東如半月南瞻部如車西牛貨洲圓如滿月徑二千五百周圓七千半北俱盧洲形如方座四邊量等面各二千既說畧方面各二千已其義已顯故等言無用或應但說圓及等言無缺畧方便爲無用又應說如滿月方座不應但說圓無缺等隨自洲相人面亦然復有八中洲是大

洲眷屬謂四大洲側各有二中洲瞻部洲邊二中洲者一遮末羅洲二筏羅遮末羅洲勝身洲邊二中洲者一提訶洲二毗提訶洲牛貨洲邊二中洲者一舍捩洲二喞怛羅漫怛里拏洲俱盧洲邊二中洲者一矩拉婆洲二僑拉婆洲此一切洲皆人所住由下劣業增上所生故住彼人身形卑陋有餘師說遮末羅洲邏利娑居餘皆人住辯諸洲已無熱惱池何方幾量頌曰

此北九黑山 雪香醉山內 無熱池縱廣五十踰繕那

論曰依至教說此瞻部洲從中印度漸次向北三處各有三重黑山有大雪山在黑山北大雪山北有香醉山雪北香南有大池水名無熱惱出四大河從四面流趣四大海一琬

伽河二信度河三私多河四縛芻河無熱惱池縱廣正等面各五十踰繕那量八功德水盈滿其中非得通人難至其所於此池側有瞻部林樹形高大其果甘美依此林故名瞻部洲或依此果以立洲號復於何處置捺落迦何量有幾頌曰

此下過二萬 無間深廣同 上七捺落迦八增皆十六 謂燄煨屍糞 鋒刃烈河增各住彼四方 餘八寒地獄

論曰此瞻部洲下過二萬有阿鼻旨大捺落迦深廣同前謂各二萬故彼底去此四萬踰繕那何緣唯此洲下有無間獄唯於此洲起極重惡業故刀兵等災唯此有故唯此洲人極利根故以無樂間立無間名所餘地獄中雖無異熟樂而無太過失有等流樂故有說

無隙立無間名雖有情少而身大故有說於中受苦無間謂彼各爲百釘釘身於六觸門恒受劇苦居熱鐵地鐵牆所圍猛燄交通曾無暫歇身遭熱逼苦痛難任雖有四門遠觀開闢而走求出便見關閉所求不遂荼毒怨傷以己身薪投赴猛火焚燒支體骨肉焦然惡業所持而不至死餘七地獄在無間上重累而住其七者何一者極熱二者炎熱三者大叫四者號叫五者衆合六者黑繩七者等活有說此七在無間傍八地獄因差別無量世尊雖有委說勝能宜聞者無故不委說少有所說具如經等如伽他言

多百踰繕那 周徧燄交徹 聞舉身毛豎生極大怖畏

如是等頌其類寔多皆爲顯成地獄因果若

外若內自身他身皆出猛火互相燒害熱中極故名爲極熱火隨身轉炎熾周圍熱苦難任故名炎熱劇苦所逼發大酷聲悲叫稱怨故名大叫衆苦所逼異類悲號怨發叫聲故名號叫衆多苦具俱來逼身合黨相殘故名衆合先以墨索拼量支體後方斬鋸故名黑繩衆苦逼身數悶如死尋穌如本故名等活謂彼有情雖遭種種斫刺磨擣而彼暫遇涼風所吹尋穌如本等前活故立等活名八捺落迦增各十六謂四門外各有四增以非皆異名但標其定數故薄伽梵說此頌言

此八捺落迦 我說甚難越 以熱鐵爲地
周匝有鐵牆 四面有四門 關閉以鐵扇
巧安布分量 各有十六增 多百踰繕那
滿中造惡者 周徧皎交徹 猛火恒洞然

此十六中受苦增劇過本地獄故說爲增或於此中受種種苦苦具多類故說爲增或地獄中適受苦已重遭此苦故說爲增有說有情出地獄已數復遭苦故說爲增門各四增名差別者塘煨屍糞鋒刃烈河門門四增名皆相似彼有情類從大獄中排極艱辛衝門走出求離求救求安所居忽復墜初塘煨增內謂此增內塘煨沒膝其量寬廣多踰繕那有情遊中纔下其足皮肉與血俱焦爛墜舉足還生平復如本經極艱阻從塘煨出復墜第二屍糞增中謂此增中屍糞泥滿查瀨臭溢深沒於人又廣於前塘煨增量於中多有蜚矩吒蟲蛄利如針身白頭黑有情遊彼皆爲此蟲鑽皮破骨啖食其髓遭苦既久從屍糞出復涉第三鋒刃增內謂此增內復有三

種初刀刃路謂於此中仰布刀刃以爲大道
有情遊踐纔下足時皮肉與血俱斷碎墜舉
足還生平復如本次劒葉林謂此林上純以
鈹利劒刃爲葉有情遊下風吹葉墜斬刺支
體骨肉零落有鳥駭狗撲令僵仆齧首齧足
斷頸擘膊攬腹搥心揠掣食噉後鐵刺林謂
此林內鐵樹高聳量過百人有利鐵刺長十
六指有情被逼上下樹時其刺鈹鋒下上鑱
刺有鐵嘴鳥探啄有情眼睛心肝爭競而食
刀刃路等三種雖殊而鐵杖同故一增攝久
經苦毒越此增已復溺第四烈河增中謂此
增河其量深廣熱鹹烈水盈滿其中有情溺
中或浮或沒或逆或順或橫或轉被蒸被煮
骨肉糜爛如大鑊中滿盛灰汁置麻米等猛
火下然麻等於中上下迴轉舉體糜爛有情

亦然設欲逃亡於兩岸上有諸獄卒手執刀
槍禦捍令迴無由得出復有獄卒張大鐵網
漉諸有情置於岸上洋銅灌其口令吞熱鐵
丸衆苦備經還擲河內此河如塹前三似園
圍繞莊嚴諸大地獄已說有八熱捺落迦寒
捺落迦亦有八種何等爲八一頰部陀二尼
刺部陀三頰嘶吒四嚩嚩婆五虎虎婆六喙
鉢羅七鉢特摩八摩訶鉢特摩此中有情嚴
寒所逼隨身聲瘡變立差別想名謂一二三
如其次第此寒地獄在繞四洲輪圍山外極
冥闇所於中恒有淒勁冷風上下衝擊縱橫
旋擁有情由此屯聚相依寒酷切身膚皮皴
裂體戰殭鞭各出異聲瘡開剖拆如三華相
多由謗賢聖招如是苦果有說此在熱地獄
傍以瞻部洲上尖下闊形如穀聚故得苞容

是故大海漸深漸狹十六大獄皆諸有情增上業感餘孤地獄或多一一各別業招或近江河山間曠野或在地下空中餘處無間大熱及炎熱三於中皆無獄卒防守大叫號叫及衆合三少有獄卒琰魔王使時時往來巡檢彼故其餘皆爲獄卒防守有情無情異類獄卒防守治罰罪有情故火不焚燒有情卒者彼身別稟異大種故或由業力所遮隔故一切地獄身形皆豎初同聖語曾聞有以聖語告言汝在人中不觀欲過又不承敬梵志沙門是故於今受斯劇苦彼聞解生慙悔心後不分明苦所逼故諸地獄器安布如是傍生所止謂水陸空生類顯形無邊差別其身行相少豎多傍如水邏刹娑及緊捺落等雖傍生攝而形豎行本住海中後流五趣初

同聖語後漸乖訛諸鬼本住琰魔王國從此展轉散趣餘方此瞻部洲南邊直下深過五百踰繕那量有琰魔王都縱廣量亦爾鬼有三種謂無少多財無財復三謂炬鍼臭口炬口鬼者此鬼口中常吐猛焰熾然無絕身如彼燎多羅樹形此受極慳所招苦果鍼口鬼者此鬼腹大量如山谷口如鍼孔雖見種種上妙飲食不能受用飢渴難忍臭口鬼者此鬼口中恒出極惡腐爛臭氣過於糞穢沸溢廁門惡氣自熏恒空嘔逆設遇飲食亦不能受飢渴所惱狂叫亂奔少財亦有三謂鍼臭毛癭鍼毛鬼者此鬼身毛堅剛鈗利不可附近內鑽自體外射他身如鹿箭中毒牀狂走時逢不淨少濟飢渴臭毛鬼者此鬼身毛臭甚常穢熏爛肌骨蒸空腸腹衝喉變嘔荼毒

難忍攬體拔毛傷裂皮膚轉加劇苦時逢不淨少濟飢渴言癭鬼者謂此鬼脬惡業力故生於大癭如大癰腫熱肺酸疼更相刺齧臭膿涌出爭共取食少得充飢多財亦有三謂希祠希棄大勢希祠鬼者此鬼恒時往祠祀中饗受他祭生處法爾能歷異方如鳥陵虛往還無礙由先勝解作是希望我若命終諸子孫等必當祠我資具飲食由勝解力生此鬼中乘宿善因感此祠祭或有先世性愛親知爲欲皆令豐足資具不如法積集珍財慳吝居心不能布施乘斯惡業生此鬼中住本舍邊便穢等處親知追念爲請沙門梵志孤窮供施崇福彼鬼見已於自親知及財物中生已有想又自明見慳果現前於所施田心生淨信相續生長捨相應思由此便成順

現法受乘斯故得資具豐饒希棄鬼者此鬼恒欲收他所棄吐殘糞等用充所食亦得豐饒謂彼宿生慳過失故有飲食處見穢或空樂穢見空樂淨見穢亦由現福如其所應各得豐饒飲食資具生處法爾所受不同不可推徵祠到所以如地獄趣異熟生色斷已還續餘趣則無於人趣中有勝念智修梵行等餘趣中無天中隨欲衆具皆現如斯等事生處法然不可於中求其定量大勢鬼者謂諸藥叉及邏刹娑恭畔荼等所受富樂與諸天同或依樹材或住靈廟或居山谷或處空宮然諸鬼中無威德者唯三洲有除北俱盧若有威德天上亦有瞻部洲西有五百渚於中有二唯鬼所居渚各有城二百五十有威德鬼住一渚城一渚城居無威德鬼曾聞昔有

大轉輪王名曰尼彌將欲巡境先告御者摩
怛黎言宜引我車從是道去使吾現見罪福
果殊時摩怛黎如王所勅引車至彼二渚中
間處上空空中令王俯見有威德鬼處妙宮臺
富樂莊嚴凌下天衆無威德鬼處穢城村老
瘦飢窮露形被髮手執瓦器乞匄支身王覩
如斯彌鑒因果諸鬼多分形豎而行於劫初
時皆同聖語後隨處別種種乖訛日月所居
量等義者頌曰

日月迷盧半 五十一五十 夜半日沒中
日出四洲等 雨際第二月 後九夜漸增
寒第四亦然 夜減晝翻此 晝夜增臘縛
行南北路時 近日自影覆 故見月輪缺
論曰日月衆星依何而住依風而住謂諸有
情業增上力共引風起繞妙高山空中旋環

運持日等令不停墜彼所住去此幾踰繕那
持雙山頂齊妙高山半日等徑量幾踰繕那
日五十一月唯五十星最小者半俱盧舍最
大者十六踰繕那日輪下面頗胝迦寶火珠
所成能熱能照月輪下面頗胝迦寶水珠所
成能冷能照隨有情業增上所生能於眼身
果華稼穡藥草等物如其所應爲益爲損四
洲日月各有別耶不爾四洲同一日月俱時
四處作所作耶不爾云何夜半日沒日中日
出四洲時等俱盧瞻部牛貨勝身隔妙高山
相對住故若俱盧夜半則瞻部日中勝身日
沒牛貨日出若牛貨日中則勝身夜半瞻部
日沒俱盧日出此略義者隨何洲相對日中
月中餘二洲隨應西沒東出第三洲處夜中
晝中由是若時勝身牛貨如其次第日中月

中爾時先明四洲皆有然先作事在東南洲於西北洲唯明作事俱見兩事在北南洲謂瞻部洲見日出月沒見月出日沒謂俱盧洲東勝身洲唯得見日唯得見月謂牛貨洲如是所餘例應思擇何緣晝夜有減有增日行此洲路有別故從兩際第二月後半第九日夜漸增從寒際第四月後半第九日夜漸減晝增減位與此相違夜漸增時晝便漸減夜漸減位晝則漸增晝夜增時一晝夜增幾增一臘縛晝夜減亦然日行此洲向南向北如其次第夜增晝增何故月輪於黑半末白半初位見有缺耶世施設中作如是釋以月宮殿行近日輪月被日輪光所侵照餘邊發影自覆月輪令於爾時見不圓滿理必應爾以於爾時亦見不明全月輪故由是日沒月便

出時相去極遙見月圓滿有餘師說由日月輪行度不同現有圓缺此不應理應無定故或應思求餘決定理日等宮殿何有情居四大天王所部天衆是諸天衆唯住此耶若空居天唯住如是日等宮殿若地居天住妙高山諸層級等有幾層級其量云何何等諸天住何層級頌曰
妙高層有四 相去各十千 傍出十六千
八四二千量 堅手及持鬘 恒憍大王衆
如次居四級 亦住餘七山
論曰蘇迷盧山有四層級始從水際盡第一層相去十千踰繕那量如是乃至從第三層盡第四層亦十千量此四層級從妙高山傍出圍繞盡其下半最初層級出十六千第二第三第四層級如其次第八四二千住初層

天名爲堅手持鬘居第二恒僑處第三四大天王及諸眷屬各一方面住第四層堅手等三天皆四王衆攝持雙山等七金山上亦有四王所部村邑是名依地住四大王衆天於欲天中此天最廣三十三天住在何處頌曰妙高頂八萬 三十三天居 四角有四峯金剛手所住 中宮名善見 周萬踰繕那高一半金城 雜飾地柔輦 中有殊勝殿周千踰繕那 外四苑莊嚴 衆車麤雜喜妙地居四方 相去各二十 東北圓生樹西南善法堂

論曰三十三天住迷盧頂其頂四面各二十千若據周圍數成八萬有餘師說面各八十千與下際四邊其量無別山頂四角各有一峯其高廣量各有五百有藥叉神名金剛手

於中止住守護諸天於山頂中有宮名善見面二千半周萬踰繕那金城量高一踰繕那半其地平坦亦真金所成俱用百一雜寶嚴飾地觸柔軟如妬羅綿於踐躡時隨足高下是天帝釋所都大城城有千門嚴飾壯麗門有五百青衣藥叉勇健端嚴踰繕那量各嚴鎧仗防守城門於其城中有殊勝殿種種妙寶具足莊嚴蔽餘天宮故名殊勝面二百五十周千踰繕那是謂城中諸可愛事城外四面四苑莊嚴是彼諸天共遊戲處一衆車苑謂此苑中隨天福力種種車現二麤惡苑天欲戰時隨其所須甲仗等現三雜林苑諸天入中所玩皆同俱生勝喜四喜林苑極妙欲塵雜類俱臻歷觀無厭如是四苑形皆畧方一一周千踰繕那量居中各有一如意池面